

**BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
V L A D A**

NACRT

Z A K O N

O OSNIVANJU JAVNE USTANOVE CENTAR ZA AUTIZAM TUZLA

Tuzla, decembar 2021. godine

Na osnovu člana 24. stav 1. tačke c) Ustava Tuzlanskog kantona („Službene novine Tuzlansko-podrinjskog kantona“, broj: 7/97 i 3/99 i „Službene novine Tuzlanskog kantona“, broj: 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici od _____ 2021. godine, donosi

Z A K O N

O OSNIVANJU JAVNE USTANOVE CENTAR ZA AUTIZAM TUZLA

I. OPĆE ODREDBE

Član 1.

(Predmet zakona)

(1) Ovim zakonom se osniva Javna ustanova Centar za autizam Tuzla (u daljem tekstu: Centar), uređuje se njegov status i pravni položaj, utvrđuje djelatnost i finansiranje, te regulište upravljanje i rukovođenje, vršenje nadzora i druga pitanja vezana za rad Centra.

(2) Na pitanja koja nisu regulisana ovim zakonom, shodno se primjenjuju odredbe Zakona o ustanovama (Sl. list RBiH“, br: 6/92, 8/93 i 13/94), Zakona o zdravstvenoj zaštiti (Sl. novine FBiH“, br: 46/10 i 75/13), Zakona o zdravstvenom osiguranju („Sl. novine FBiH“, br: 30/97, 7/02, 70/08, 48/11, 100/14 i 36/18), Zakona o predškolskom odgoju i obrazovanju – prečišćeni tekst („Sl. novine TK“, br: 10/20), Zakona o osnovnom odgoju i obrazovanju – prečišćeni tekst („Sl. novine TK“, br: 10/20, 8/21 i 11/21), Zakona o srednjem obrazovanju i odgoju – prečišćeni tekst („Sl. novine TK“, br: 10/20, 11/20, 8/21 i 11/21) Zakona o obrazovanju odraslih („Sl. novine TK“ br: 9/15) i Zakona o socijalnoj zaštiti, zaštiti civilnih žrtava rata i zaštiti porodice sa djecom – prečišćeni tekst („Sl. novine TK“ br: 5/12, 7/14, 11/15, 13/16, 4/18 i 12/20), kao i drugih relevantnih propisa.

Član 2.

(Status)

(1) Centar je javna ustanova u državnoj svojini koju osniva Tuzlanski kanton (u daljem tekstu: osnivač) u svrhu obavljanja djelatnosti, koja se utvrđuje ovim zakonom, na području Tuzlanskog kantona.

(2) Centar ima svojstvo pravnog lica koji stiče danom upisa u registar kod nadležnog suda.

Član 3.

(Naziv i sjedište)

(1) Centar obavlja svoju djelatnost pod nazivom Javna ustanova Centar za autizam Tuzla.

(2) Skraćeni naziv Centra je JU Centar za autizam Tuzla.

(3) Sjedište Centra je u Tuzli, adresa Bukinje bb.

Član 4. (Pečat)

(1) Centar ima pečat okruglog oblika, sa tekstom: „Bosna i Hercegovina – Federacija Bosne i Hercegovine – Tuzlanski kanton – Javna ustanova Centar za autizam Tuzla“, sve ispisano u koncentričnim krugovima, na službenim jezicima i službenim pismima koji su u upotrebi u organima državne službe u Federaciji Bosne i Hercegovine.

(2) Ostala pitanja o broju, vrsti i upotrebi pečata iz stava (1) ovog člana, regulišu se pravilima Centra.

II. DJELATNOST

Član 5. (Glavna djelatnost)

Glavna djelatnost Centra je:

- a) djelatnost zdravstvene zaštite:
 - detekcija, opservacija i rana intervencija;
 - individualni i grupni logopedski tretman djece i osoba sa poremećajima iz autističnog spektra;
 - individualni i grupni defektološki tretman djece i osoba sa poremećajima iz autističnog spektra;
 - izrada individualnog plana i programa za djecu i osobe sa poremećajima iz autističnog spektra;
 - psihosocijalna podrška djece i osoba sa poremećajima iz autističnog spektra;
 - edukacija roditelja djece i osoba sa poremećajima iz autističnog spektra;
 - edukacija stručnog osoblja;
 - supervizija stručnog osoblja;
 - praćenje razvoja djece i osoba sa poremećajima iz autističnog spektra u okviru djelatnosti zdravstvene zaštite;
 - drugi poslovi određeni pravilima Centra.
- b) djelatnost odgoja i obrazovanja:
 - predškolski odgoj i obrazovanje djece sa poremećajima iz autističnog spektra;
 - osnovni odgoj i obrazovanje učenika sa poremećajima iz autističnog spektra;
 - srednji odgoj i obrazovanje učenika sa poremećajima iz autističnog spektra;
 - obrazovanje odraslih sa poremećajima iz autističnog spektra i ostalo obrazovanje;
 - praćenje razvoja djece i osoba sa poremećajima iz autističnog spektra u okviru djelatnosti odgoja i obrazovanja;
 - drugi poslovi određeni pravilima Centra.
- c) djelatnost socijalne zaštite:
 - smještaj djece i osoba sa poremećajima iz autističnog spektra;

- radno-okupaciona terapija;
- praćenje razvoja djece i osoba sa poremećajima iz autističnog spektra u okviru djelatnosti socijalne zaštite;
- drugi poslovi određeni pravilima Centra.

Član 6.
(Razvrstavanje djelatnosti)

Djelatnosti Centra iz člana 5. ovog zakona se razvrstavaju u skladu sa Odlukom o klasifikaciji djelatnosti Bosne i Hercegovine 2010 („Službeni glasnik BiH“ broj: 47/10), koja se shodno članu 5. Zakona o klasifikaciji djelatnosti u Federaciji Bosne i Hercegovine („Službene novine FBiH“ broj: 64/07 i 80/11) primjenjuje na teritoriji Federacije Bosne i Hercegovine i to na:

a) Zdravstvena zaštita:

- 86.22. Djelatnosti specijalističke medicinske prakse;
- 86.90. Ostale djelatnosti zdravstvene zaštite;

b) Odgoj i obrazovanje:

- 85.10. Predškolsko obrazovanje;
- 85.20. Osnovno obrazovanje;
- 85.31. Opće srednje obrazovanje;
- 85.59. Ostalo obrazovanje i podučavanje, d.n.;

c) Socijalna zaštita:

- 87.10. Djelatnosti ustanova sa smještajem koje uključuje određeni stepen zdravstvene njege;
- 87.20 Djelatnost u ustanovama sa smještajem za osobe s teškoćama u razvoju, duševno bolesne i osobe ovisne o alkoholu, drogama ili drugim opojnim sredstvima s uključenim određenim stepenom zdravstvene njege;
- 87.90. Ostale djelatnosti socijalne zaštite u ustanovama sa smještajem;
- 88.91. Djelatnost dnevne brige o djeci.

Član 7.
(Ostale djelatnosti)

(1) Pored glavne djelatnosti iz člana 5. ovog zakona, Centar može, bez upisa u sudski registar, obavljati sporedne i pomoćne djelatnosti, koje su u funkciji obavljanja glavne djelatnosti Centra, uz prethodno pribavljenu saglasnost osnivača.

(2) Centar može, sam ili u saradnji sa drugim relevantnim institucijama i udruženjima, pripremati i realizirati projekte, programe i poduzimati druge aktivnosti, u cilju unapređenja opremljenosti Centra, edukativnih, prostornih i drugih uslova za obavljanje djelatnosti Centra.

(3) O projektima i programima iz stava (2) ovog člana odlučuje upravni odbor Centra na prijedlog direktora te ustanove.

III. FINANSIRANJE I ODGOVORNOST

Član 8.

(Sredstva za osnivanje, početak rada i osnivački ulog)

(1) Sredstva za osnivanje i početak rada Centra osigurava osnivač iz Budžeta Tuzlanskog kantona.

(2) Osnivački ulog Centra koji se plaća prilikom osnivanja iznosi 1.000,00 KM.

Član 9.

(Sredstva za rad)

(1) Sredstva za dalji rad i obavljanje djelatnosti Centra osiguravat će se iz:

- a) budžeta Tuzlanskog kantona;
- b) ličnog učešća korisnika usluga u skladu sa propisima koji regulišu uslugu koja se koristi i općim aktima Centra;
- c) sredstava pravnih i fizičkih lica koja preuzmu obavezu plaćanja smještaja,
- d) projekata i drugih aktivnosti Centra;
- e) naknada za obavljanje intelektualnih i drugih usluga;
- f) poklona, donacija, legata, zavještanja, kao i
- g) drugih izvora.

(2) Sredstva za dalji rad i obavljanje djelatnosti Centra mogu se osiguravat i iz:

- a) budžeta Federacije BiH i
- b) budžeta grada/općine.

Član 10.

(Odgovornost za obaveze prema trećim licima)

(1) Za svoje obaveze prema trećim licima Centar odgovara sredstvima kojima raspolaže – potpuna odgovornost.

(2) Ako u obavljanju svoje djelatnosti Centar ostvari višak prihoda, taj višak prihoda će se upotrijebiti isključivo za razvoj djelatnosti Centra.

(3) Osnivač odgovara supsidijarno za obaveze Centra.

(4) Ako u obavljanju svoje djelatnosti Centar iskaže manjak prihoda u odnosu na rashode, ovisno o izvoru osiguranja sredstava za financiranje javnih potreba Centra sukladno Zakonu, osnivač će izvršiti pokriće manjka prihoda, uz uvjet da je Centar pravilno, u skladu sa propisima i odlukama nadležnog ministarstva odnosno osnivača, koristio sredstva, a u suprotnom ih je Centar dužan podmiriti i vratiti.

Član 11.

(Odgovornost i obaveze prema osnivaču)

(1) Centar je odgovoran osnivaču za rezultate svoga rada i obavljanje djelatnosti za koje je osnovan.

(2) Obaveze Centra prema osnivaču su da:

a) pribavi odluku osnivača za proširenje ili promjenu djelatnosti, kao i za vršenje statusnih promjena: spajanje, pripajanje, podjelu i izdvajanje;

b) pribavi saglasnost osnivača za promjenu sjedišta ili naziva Centra;

c) redovno, a najmanje jednom godišnje, osnivaču podnosi izvještaj o radu sa izvještajem o finansijskom poslovanju Centra.

(3) Ostala pitanja koja se tiču međusobnih prava i obaveza između osnivača i Centra uredit će se pravilima Centra na koja saglasnost daje Vlada Tuzlanskog kantona (u daljem tekstu: Vlada).

IV. ORGANI

Član 12.

(Organ upravljanja)

(1) Organ upravljanja u Centru je upravni odbor.

(2) Predsjednika i članove upravnog odbora Centra (u daljem tekstu: upravni odbor) imenuje i razrješava u ime osnivača Vlada na period od četiri godine, u skladu sa odredbama Zakona o ministarstkim, vladinim i drugim imenovanjima („Sl.novine FBiH“ br. 1/03, 34/03 i 65/13).

(3) Upravni odbor se sastoji od predsjednika i četiri člana, od kojih se predsjednik i dva člana imenuju kao predstavnici osnivača, a preostala dva člana se imenuju iz reda stručnih radnika zaposlenih u Centru.

(4) Za predsjednika ili člana upravnog odbora ne može biti imenovan direktor Centra, zaposlenik organa koji vrše nadzor nad radom te ustanove, kao ni druge osobe kada je to zakonom ili drugim propisom određeno.

Član 13.

(Direktor)

(1) Organ rukovođenja u Centru je direktor koji zastupa i predstavlja Centar a koga imenuje i razrješava upravni odbor, na osnovu javnog konkursa, uz saglasnost Vlade.

(2) Direktor Centra se imenuje na period od četiri godine i može biti ponovo imenovan na istu dužnost.

(3) Direktor Centra mora imati najmanje VSS-VII stepen stručne spreme odnosno I ciklus Bolonjskog sistema studiranja koji se vrednuje sa najmanje 240 ECTS bodova iz oblasti zdravstva, obrazovanja ili socijalne zaštite, te mora ispunjavati i ostale uslove za imenovanje na tu poziciju, koji se utvrđuju pravilima Centra.

Član 14.

(Razrješenje prije isteka mandata)

(1) Vlada razrješava predsjednika i/ili članove upravnog odbora prije isteka mandata, na njihov lični zahtjev, kao i u slučaju kada utvrdi da su odgovorni za neuspješan ili nezakonit rad Centra, za neusvajanje izvještaja o poslovanju, odnosno izvještaja o radu sa izvještajem o

finansijskom poslovanju Centra od strane Skupštine Tuzlanskog kantona, kao i u drugim slučajevima utvrđenim zakonom, drugim propisima i pravilima Centra.

(2) Pravilima Centra precizira se postupak i način imenovanja i razrješenja direktora, odnosno imenovanja vršioca dužnosti direktora Centra u slučaju kada ta pozicija ostane upražnjena.

Član 15. (Opći akti)

(1) Opći akti centra su: pravila, pravilnik o unutrašnjoj organizaciji i sistematizaciji radnim mjestima, pravilnik o radu i drugi opći akti u skladu sa odredbama Zakona o ustanovama i djelatnošću Centra.

(2) Pravila Centra sadrže odredbe u skladu sa članom 38. Zakona o ustanovama.

Član 16. (Standardi i normativi)

(1) Centar počinje sa radom kada ispuni uslove za početak rada propisane standardima i normativima za obavljanje djelatnosti Centra, koje donosi Vlada.

Član 17. (Rješenje o ispunjavanju uslova za početak rada)

Rješenje o ispunjavanju uslova za početak rada Centra donosi Ministarstvo za rad, socijalnu politiku i povratak uz prethodno pribavljenu saglasnost Ministarstva zdravstva i Ministarstva obrazovanja i nauke.

Član 18. (Rješenje o ispunjavanju uslova za obavljanje djelatnosti)

(1) Centar može početi da obavlja djelatnost kada Ministarstvo za rad, socijalnu politiku i povratak rješenjem utvrdi da ispunjava uslove propisane standardima i normativima iz člana 16. ovog zakona.

(2) Rješenje o ispunjavanju uslova za obavljanje djelatnosti Centra donosi Ministarstvo za rad, socijalnu politiku i povratak uz prethodno pribavljenu saglasnost za ispunjavanje uslova od strane Ministarstva zdravstva i/ili Ministarstva obrazovanja i nauke ovisno za koju vrstu djelatnosti je zahtjev podnesen.

Član 19. (Davanje mišljenja)

(1) Mišljenje u vezi sa pitanjima iz člana 27. alineje 1. do 6. Zakona o ustanovama daje Ministarstvo za rad, socijalnu politiku i povratak.

(2) Prije davanja mišljenja iz stava (1) ovog člana Ministarstvo za rad, socijalnu politiku i povratak je obavezno pribaviti mišljenja Ministarstva zdravstva i Ministarstva obrazovanja i nauke.

Član 20
(Stručni timovi)

U cilju obavljanja djelatnosti za koju je osnovan, u Centru se formiraju stručni timovi za rad u sjedištu te ustanove i po potrebi, mobilni stručni timovi, čiji će se poslovi, zadaci i način njihovog obavljanja odrediti pravilima Centra.

V. OKVIRNA UNUTRAŠNJA ORGANIZACIJA

Član 21.
(Organizacione jedinice)

(1) Za izvršavanje glavne djelatnosti Centra iz člana 5. ovog zakona formiraju se posebne organizacione jedinice:

- a) Odjel zdravstvene zaštite;
- b) Odjel predškolskog, osnovnog i srednjeg odgoja i obrazovanja;
- c) Odjel obrazovanja odraslih;
- d) Odjel socijalne zaštite;
- e) Odjel za pravne, finansijske i opće poslove.

(2) Poslovi koji će se obavljati u navedenim odjelima definisat će se općim aktima Centra.

(3) U skladu sa pravilima Centra mogu se formirati i druge organizacione jedinice u skladu sa potrebama, razvojem i unapređenjem Centra.

Član 22.
(Utvrđivanje unutrašnje organizacije)

(1) Unutrašnja organizacija i sistematizacija radnih mjesta u Centru utvrđuje se pravilnikom koji donosi upravni odbor na prijedlog direktora te ustanove, uz prethodno pribavljenu saglasnost Vlade.

(2) Pravilnik iz stava (1) ovog člana se donosi shodno okvirnoj unutrašnjoj organizaciji Centra, utvrđenoj ovim zakonom.

Član 23.
(Ostvarivanje prava zaposlenika)

Zaposlenici Centra ostvaruju prava shodno zakonu, pravilima i drugim općim aktima Centra i kolektivnom ugovoru.

VI. VRŠENJE NADZORA

Član 24.

(Nadzor nad provedbom zakona)

Nadzor nad provođenjem odredaba ovog zakona vrše Ministarstvo zdravstva, Ministarstvo obrazovanja i nauke, Pedagoški zavod i Ministarstvo za rad, socijalnu politiku i povratak svako u okviru svoje nadležnosti.

Član 25.

(Inspekcijski nadzor)

Inspekcijski nadzor nad radom Centra, vrši zdravstvena, obrazovna inspekcija i inspekcija socijalne zaštite.

VII. PRIJELAZNE I ZAVRŠNE ODREDBE

Član 26.

(Rok za donošenje standarda i normativa)

Standarde i normative iz člana 16. ovog zakona će donijeti Vlada u roku od 90 dana od dana stupanja na snagu ovog zakona.

Član 27.

(Privremeni upravni odbor)

(1) Vlada će imenovati Privremeni upravni odbor Centra, u roku od 30 dana od dana stupanja na snagu ovog zakona, koji će upravljati Centrom do konačnog imenovanja upravnog odbora Centra, a najduže na period od šest mjeseci.

(2) Privremeni upravni odbor je obavezan, u roku od 60 dana od dana imenovanja, donijeti pravila Centra, utvrditi unutrašnju organizaciju i sistematizaciju radnih mjesta i donijeti druge opće akte Centra, te poduzeti ostale neophodne radnje za početak rada Centra.

Član 28.

(Vršilac dužnosti direktora)

(1) U periodu od osnivanja Centra do imenovanja direktora, Centar zastupa i predstavlja vršilac dužnosti direktora, sa svim ovlaštenjima i odgovornostima direktora te ustanove.

(2) U roku od 30 dana od dana stupanja na snagu ovog zakona, Privremeni upravni odbor će imenovati vršioca dužnosti direktora Centra, koji će tu dužnost vršiti do konačnog imenovanja direktora Centra, a najduže na period od šest mjeseci.

Član 29.
(Upis u sudski registar)

Ovaj Zakon predstavlja osnivački akt na osnovu kojeg će se izvršiti upis Centra u sudski registar.

Član 30.
(Stupanje na snagu)

Ovaj zakon stupa na snagu osmog dana od dana objavljivanja u „Službenim novinama Tuzlanskog kantona“.

B o s n a i H e r c e g o v i n a
Federacija Bosne i Hercegovine
T U Z L A N S K I K A N T O N
Skupština

Broj:
Tuzla, 2021. godina

Predsjednik
Skupštine Tuzlanskog kantona

Sladjan Ilić

OBRAZLOŽENJE

UZ NACRT ZAKONA O OSNIVANJU JAVNE USTANOVE CENTAR ZA AUTIZAM TUZLA

I PRAVNI OSNOV

Ustavni osnov za donošenje Zakona o osnivanju JU Centar za autizam Tuzla sadržan je u odredbi člana 24. stav 1. tačka c) Ustava Tuzlanskog kantona („Službene novine Tuzlansko-podrinjskog kantona“, broj: 7/97 i 3/99 i „Službene novine Tuzlanskog kantona“, broj: 13/99, 10/00, 14/02, 6/04 i 10/04), kojim je utvrđeno da Skupština Tuzlanskog kantona pored ostalih nadležnosti donosi i zakone i ostale propise neophodne za izvršavanje funkcija Kantona.

II RAZLOZI ZA DONOŠENJE ZAKONA SU:

Završetkom izgradnje objekta predviđenog za JU Centra za autizam stekli su se uslovi za donošenje Zakona o osnivanju JU Centar za autizam.

III OBRAZLOŽENJE PREDLOŽENIH RJEŠENJA

- Članom 1. Nacrta određen je predmet zakona odnosno status, pravni položaj, djelatnost, finansiranje, upravljanje i rukovođenje, vršenje nadzora i druga pitanja vezana za rad Centra, kao i propisi koji se primjenjuju na pitanja koja nisu regulisana ovim zakonom.
- Članom 2. Nacrta uređen je status Centra.
- Članom 3. Nacrta uređen je naziv i sjedište Centra.
- Članom 4. Nacrta uređen je izgled i sadržaj pečata Centra.
- Članom 5. Nacrta određena je glavna djelatnost Centra podjeljena na tri resora i to djelatnost zdravstvene zaštite, djelatnost odgoja i obrazovanja i djelatnost socijalne zaštite.
- Članom 6. Nacrta razvrstana je djelatnost Centra u skladu sa Odlukom o klasifikaciji djelatnosti Bosne i Hercegovine.
- Članom 7. Nacrta određene su i ostale djelatnosti Centra koje su u funkciji obavljanja glavne djelatnosti.

- Članom 8. Nacrta određeno je ko osigurava sredstva za osnivanje i početak rada Centra kao i koliki je osnivački ulog Centra.
- Članom 9. Nacrta određeni su izvori iz kojih će se osiguravati sredstva i izvori iz kojih se mogu osiguravati sredstva za dalji rad i obavljanje djelatnosti Centra
- Članom 10. Nacrta određena je odgovornost Centra i osnivača za obaveze prema trećim licima, a članom 11. Nacrta određena je odgovornost Centra prema osnivaču.
- Članom 12. Nacrta određen je organ upravljanja Centra, njegov sastav i način njegovog imenovanja i razrješenja.
- Članom 13. Nacrta određen je organ rukovođenja Centra, način njegovog imenovanja i razrješenja, kao i školska sprema i oblasti iz kojih može biti imenovan direktor Centra.
- Članom 14. Nacrta određeno je kada i na koji način se može razrješiti organ upravljanja.
- Članom 15. Nacrta određeni su opći akti Centra i sadržaj pravila Centra.
- Članom 16. Nacrta određeni su uslovi za početak rada Centra.
- Članom 17. Nacrta određeno je ko i na koji način donosi rješenje o ispunjavanju uslova za početak rada Centra.
- Članom 18. Nacrta određeno je kada Centar može početi da obavlja djelatnost kao i ko i na koji način donosi rješenje o ispunjavanju uslova za obavljanje djelatnosti Centra.
- Članom 19. Nacrta određen je način davanja mišljenja u vezi sa pitanjima iz člana 27. alineje 1. do 6. Zakona o ustanovama RBiH (opšti akt o unutrašnjoj organizaciji i sistematizaciji, pravila, godišnji program rada, plan rada i razvoja i dr.)
- Članom 20. Nacrta određeno je formiranje stručnih timova i mobilnih stručnih timova.
- Članom 21. Nacrta određene su organizacione jedinice za izvršavanje glavne djelatnosti Centra.
- Članom 22. Nacrta određen je način utvrđivanja unutrašnje organizacije i sistematizacije radnih mjesta u Centru.
- Članom 23. Nacrta određen je način ostvarivanja prava zaposlenika.
- Članom 24. Nacrta određeni su subjekti vršenja nadzora nad provedbom ovog zakona.
- Članom 25. Nacrta određen je inspekcijski nadzor.
- Članom 26. Nacrta određen je rok za donošenje standarda i normativa Centra.
- Članom 27. Nacrta određen je rok za imenovanje privremenog upravnog odbora i njegove obaveze.

- Članom 28. Nacrta određen je rok za imenovanje vršioca dužnosti direktora Centra.
- Članom 29. Nacrta određen je upis u sudski registar.
- Članom 30. Nacrta određeno je kada Zakon stupa na snagu.

IV FINANSIJSKA SREDSTVA POTREBNA ZA PROVEDBU ZAKONA

Ukoliko se prihvate predložena rješenja u Zakonu o osnivanju JU Centar za autizam Tuzla bit će potrebna finansijska sredstva za primjenu ovog Zakona u 2022. godini u iznosu od 500.000,00 KM koliko je i planirano u budžetskom zahtjevu Ministarstva za rad, socijalnu politiku i povratak za 2022. godinu.

Što se tiče finansijskih sredstava za rad JU Centar za autizam Tuzla za 2023. godinu i naredne godine njihov iznos je u ovom momentu teško odrediti i taj iznos će zavisi od početka rada Centra, odnosno koje djelatnosti će prvo početi obavljati Centar i u kojem vremenskom periodu, koje će se usluge korisnicima početi pružati, koliko će zaposlenih biti potrebno za te djelatnosti i usluge, koji je broj korisnika usluga, te koju opremu i ostala sredstva će biti potrebno nabaviti za početak rada Centra i obavljanje djelatnosti i pružanje usluga.

U svakom slučaju za 2023. godinu i naredne godine za rad JU Centar za autizam Tuzla će biti potreban veći iznos sredstava od onog za 2022. godinu.

V NACRT ZAKONA

Budući da se radi o propisu kojim se osniva Javna ustanova Centar za autizam potrebno je da isti bude u formi Nacrta, te da se nakon usvajanja istog provede Javna rasprava u roku od 45 dana kako bi drugi organi, institucije, organizacije ali i sva druga relevantna pravna i fizička lica mogla dati prijedloge, primjedbe i sugestije na Nacrt Zakona.

PREDLAGAČ:
VLADA KANTONA

